

مش أنا

إتبدلت حتى الملامح والوشوش
ولاقتني تايه وسط عالم ماعرفوش
الاسم هو بس صاحبه مش أنا
بيانات بتحلف ان عمري مائة سنة
لأ كدابين

أنا بس عمري يادوب يومين

يوم جيت

ويوم غمضت

قمت

صحيت

لقيتني بعيش في حدوده

وأحداث وحشة ملتوتة

وفجأة العمر عدى وفات

وعدت بي كده مسافات
ماحستهاش
ويقولوا عاش
ورحمة عمري يا اخونا
دي أرقام زايغة مضروبة
وأعمار بس مكتوبة
وكذب في كذب
ما بين العصر والمغرب
يعدي الصعب
وآه ياسنين بتخدعنا
تحسسنا بأوجعنا
ونتفرج على الماضي
كأنه قلم بيصفعنا
ونتغرب
ونتدارى بأوجاعنا

ونرجع تاني مرجوعنا
وتتبدل سنين بسنين
ونمسح دمعنا المسكين
ويحكوا
يقولوا كان ياما كان
ومين قالوا؟
وفين كانوا؟
بقينا جزء من رحلة
بدت بزمان
وراح يحكيها ناس
في زمان